



Republika e Kosovës – Republika Kosova  
Paneli Zgjedhor për Ankesa dhe Parashtresa  
Izborni Panel za Žalbe i Predstavke

Anr.634/2021

**Paneli Zgjedhor për Ankesa dhe Parashtresa (PZAP)**, në panelin e përbërë nga gjyqtarët: Adnan Konushevci kryesues, Afijete Sada - Gillogjani dhe Kimete Kica anëtarë, duke vendosur përkitazi me ankesën e subjektit politik Lëvizja Vetëvendosje, me seli në Prishtinë, të paraqitur kundër subjektit politik Lidhja Demokratike e Kosovës (LDK), me seli në Prishtinë, për shkak të thyerjes së heshtjes zgjedhore, në rrjete sociale, për Zgjedhjet Lokale të datës 17.10.2021, në seancën e panelit të mbajtur me datë 18.10.2021, mori këtë:

## V E N D I M

**I. Pranohen** të bazuara ankesat e Anr.634/2021, Anr.636/2021 të datës 17.10.2021 të paraqitura nga subjektit politik, Lëvizja Vetëvendosje, ndërsa Subjektit politik Lidhja Demokratike e Kosovës, i shqiptohet gjobë, në lartësi prej 800.00 euro (tetëqind) ,për shkak të thyerjes së heshtjes zgjedhore, në rrjetet sociale, për zgjedhjet lokale të datës 17.10.2021..

**II. DETYROHET** Subjekti politik Lidhja Demokratike e Kosovës (LDK), që gjobën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e marrjes së këtij vendimi, nën kërcënim e shqiptimit të dënimit shtesë.

## A r s y e t i m

Me datë 17.10.2021, PZAP-i ka pranuar ankesat Anr.634/2021, dhe Anr.636/2021 të datës 17.10.2021, të paraqitur nga subjekti politik Lëvizja Vetëvendosje, kundër subjektit politik Lidhja Demokratike e Kosovës, në të cilat pretendon se me datë 16 tetor 2021, rreth orës 18:00 aktivistët e Lëvizjes Vetëvendosje nga qendra në Prishtinë, kanë vërejtur se mbështetësi i Lidhjes Demokratike të Kosovës Shabi Arifi, dhe kandidati per kuvendin Komunal Adnan Zymberi, kanë thyer heshtjen zgjedhore, duke bërë postimin e një fotografie të shoqëruar me një mbishkrim me përmbajtje elektorale, postim ky i shfaqur në rrjetin social facebook, duke bërë thirrje për votimin e kësaj partie politike si dhe kandidatimn e saj për kryetar komune. Kjo foto është publikuar gjatë heshtjes zgjedhore dhe kjo dëshmohe me provën e bashkangjitur ankesës – foto, ku vërehet ora dhe data e saktë e këtij postimi, këto të dhëna janë marrë nga platforma e rrjetit social facebook dhe kjo është në kundërshtim me nenin 36 par 1 pika b të LZP-së dhe me nenin 8 par 1 pika c të rregullës zgjedhore.

Përgjigje në ankesa nuk ka paraqitur subjekti politik Lidhja Demokratike e Kosovës, edhe pse e njëjta është njoftuar me kërkesë për përgjigje në ankesë.

PZAP-i, pas shqyrtimit të bazueshmërisë së ankesave dhe vlerësimit të pretendimeve ankimore, provave materiale,, që gjenden në shkresat e lëndës, në kuptim të nenit 117 paragrafi 2 dhe 3 të LZP-së, gjeti se:

### **Ankesat janë të bazuara**

Paneli, pasi ka vlerësuar pretendimet në ankesat Anr.634/2021, dhe Anr.636/2021 të datës 17.10.2021, të cilat për nga përmbajtja janë të njëjta, për nga natyra e shkeljes së pretenduar janë të njëjta, paraqitës i ankesave është subjekti politik Lëvizja Vetëvendosje dhe po ashtu të njëjtat janë paraqitur kundër subjektit të njëjtë politik Lidhja Demokratike e Kosovës, prandaj Paneli, bazuar në nenin 8 paragrafi 3 të Rregullave dhe Procedurave Nr.02/2015, të PZAP-it, në të cilën përcaktohet se: *“Me qëllim të lehtësimit të shqyrtimit të ankesave kryesuesi i panelit vendimmarrës mund të vendos ta bëjë bashkimin e ankesave që përmbajnë në vete çështje të ngjashme dhe se ato ankesa të trajtohen me një vendim”*, bëri bashkimin e ankesave dhe për të njëjtat vendosi me një vendim, si në dispozitiv të këtij vendimi.

Nga shkresat e lëndës shihet se subjekti politik Lidhja Demokratike e Kosovë, konkretisht mbështetësi i këtij subjekti Shabi Arifi dhe kandidati për Kuvend Komunale për Komunën e Podujevës, gjatë heshtjes zgjedhore dhe ditës së votimit në rrjetin e saj social Facebook përmes postimeve në facebook, ka bërë fushatë zgjedhore duke bërë thirrje që të votohet kandidati për kryetar në Komunën e Artanës, përkatësishtë kandidatin për kryetarë të Komunës së Podujevës, e me këtë veprim kanë bërë thyerjen e heshtjes zgjedhore.

Paneli, konform nenit 8 par. 5 të Rregullave dhe Procedurave të PZAP-it, Nr. 02/2015, ndërmori hetim lidhur me pretendimet e paraqitësit të ankesës, dhe gjeti se të njëjtat pretendime janë të bazuara, për faktin se në llogarinë e Facebook-ut, ashtu siç pretendon paraqitësi i ankesës për postimin e Shabi Arifit, në ditën e heshtjes zgjedhore, i njëjti postim është bërë me datë 17.10.2021, në ora 11:59, dhe në kohën e verifikuar nga PZAP, ka qenë ende aktive dhe e shfaqur, ndërsa postimi i kandidatit për kuvend Komuna Adnan Zymeri, është publikuar me datë 17.10.2021, ora 10:47 dhe në këtë mënyrë kanë thyer heshtjen zgjedhore.

Paneli, vendimin e tij e mbështet në dëshmi të qarta dhe bindëse, konform nenit 117 par.3 të LZP-së, andaj nuk i mori parasysh pretendimet e paraqitësit të përgjigjes në ankesë, pasi që nga ana e tyre nuk u ofrua ndonjë dëshmi e cila argumenton pretendimet e tyre.

Andaj Paneli, duke iu referuar të cekurave më lart dhe në mbështetje të dispozitave ligjore të LZP-së konstaton se subjekti politik Lidhja Demokratike e Kosovës, është përgjegjëse për veprimet e tija, pasi që me veprimet e lartcekura ka shkelur nenin 36 paragrafi 1 pika b) të LZP-së, që përcakton se: *“veprimet e ndaluara para procesit të votimit ku thuhet se 24 orë para hapjes së Qendrave të Votimit për hedhjen e votës, deri në mbylljen e tyre, subjekteve politike, mbështetësve ose kandidatëve të tyre u ndalohe bërja e fushatës në çfarëdo mënyre”*.

Paneli, me rastin e shqiptimit të gjobës si në dispozitiv të këtij vendimi, u mbështet në dispozitat e lart cituara, e në veçanti duke marr parasysh rrethanat e rastit siç janë: natyra e shkeljes dhe ndikimit të mundshëm të saj, në procesin zgjedhor, shkallën dhe peshën e shkeljes, faktin se subjekti politik të cilit i është shqiptuar gjoba, ka marrë pjesë në zgjedhjet

e mëparshme, shumën e fondeve të marra nga subjekti politik prej Buxhetit të Republikës së Kosovës, për zhvillimin e aktiviteteve të lidhura më fushatën zgjedhore.

Paneli, vlerëson se gjoba e shqiptuar si masë, përveç aspektit të dënimit në raport me subjektin që nuk e ka respektuar Kodin e Mirësjelljes, shërben edhe si masë preventive që në të ardhmen subjektet politike të përmbahen nga veprimet e tilla që bien ndesh me rregullativën ligjore, që cenojnë të drejtën apo lirinë e votimit, në mënyrë që të sigurohet klimë e qetë dhe e përshtatshme për votim të lirë dhe të pa ndikuar si bazament i një procesi demokratik zgjedhor.

Nëse subjekti të cilit i është shqiptuar dënimi nuk e paguan të njëjtin brenda afatit të përcaktuar në dispozitiv të tij, atëherë në pajtim me nenin 120.2 të LZP-së, subjektit do ti shqiptohet dënim shtesë. Ky paralajmërim për dënim shtesë është përcaktuar me nenin 120.2 të LZP, i cili përcakton: “ 120.2 Dështimi për të paguar dënimin apo për t’ju bindur një urdhërese të PZAP-it brenda periudhës kohore të saktësuar në vendimin e PZAP-it, është një shkelje tjetër e këtij ligji që mund të sanksionohet me dënim shtesë nga PZAP-i. ”, ashtu siç është vendosur në pikën II të dispozitivit të këtij vendimi.

Paneli mbi bazën e të dhënave të lartcekuar në mbështetje të nenit 120.1 pika c) dhe nenit 118.1 të LZP-së, vendosi si në dispozitiv të këtij vendimi.

**Paneli Zgjedhor për Ankesa dhe Parashtrësia**  
**Anr.634/2021 më datë 18.10.2021**



***Këshillë Juridike: Kundër këtij vendimi nuk është e lejuar ankesa.***